



Broj: UP-I-KSI-09-09/25
Datum: 07.11.2025. godine

Na osnovu člana 25. stav (1) tačka a) i b), člana 32. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) i člana 25. Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“, broj: 19/21), Komisija za odlučivanje o sukobu interesa, postupajući po službenoj dužnosti u predmetu utvrđivanja povrede odredaba Zakona o sprečavanju sukoba interesa u institucijama Brčko distrikta Bosne i Hercegovine od strane A. D. iz Brčkog, ulica [REDACTED], Brčko, direktor JP „Komunalno Brčko“ d.o.o. Brčko distrikta Bosne i Hercegovine, nosioca javne funkcije, na 134. sjednici, održanoj dana 07.11.2025. godine, donosi

RJEŠENJE

1. UTVRĐUJE SE da je A. D. iz Brčkog, ulica [REDACTED], direktor JP „Komunalno Brčko“ d.o.o. Brčko distrikta Bosne i Hercegovine, nosilac javne funkcije postupio protivno članu 21. stav (1) tačka b) Zakona o sprečavanju sukoba interesa u institucijama Brčko distrikta Bosne i Hercegovine, a u vezi sa članom 19. stav (2) Zakona o sprečavanju sukoba interesa u institucijama Brčko distrikta Bosne i Hercegovine, na način da nije izvršio dopunu Izvještaja o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, u roku od 30 dana od dana uvećanja imovine odnosno, nije prijavio promjenu pokretne imovine, vrijednosti veće od 10.000,00 KM.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, A. D. se shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine izriče opomena.

Obrazloženje

A. D. obavlja funkciju direktora JP „Komunalno Brčko“ d.o.o. Brčko distrikta Bosne i Hercegovine, na osnovu Odluke broj: [REDACTED] od 24.02.2025. godine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javne funkcije i nosilaca javne funkcije.

Članom 22. Poslovnika o radu Komisije za odlučivanje o sukobu interesa propisano je da je nosilac javne funkcije stranka u postupku.

Dana 29.10.2025. godine, Komisija za odlučivanje o sukobu interesa po službenoj dužnosti Zaključkom, broj: UP-I-KSI-09-09/25, pokrenula je postupak protiv nosioca javne funkcije A. D. iz Brčkog, direktora JP „Komunalno Brčko“ d.o.o. Brčko distrikta Bosne i Hercegovine, ulica

██████████, jer je posumnjala u tačnost i potpunost podataka u podnesenom Izvještaju o imovinskom stanju, na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, zbog nesaglasnosti između podataka o prijavljenoj pokretnoj imovini u Izvještaju o imovinskom stanju podnesenom dana 28.03.2025. godine od strane nosioca javne funkcije Komisiji za odlučivanje o sukobu interesa i podataka prikupljenih od nadležnih organa i institucija o pokretnoj imovini. Naime, nosilac javne funkcije nije prijavio u Izvještaj o imovinskom stanju pokretnu imovinu odnosno automobil marke Peugeot 3008, registarskih oznaka ██████████, godina proizvodnje 2018., vlasništvo nosioca javne funkcije, a za koje se unose podaci u Izvještaj o imovinskom stanju, čime je postupio protivno odredbama člana 19. stav (1) i stav (2) te člana 20. Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim Zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja Zaključka.

Nakon prijema Zaključka o pokretanju postupka, broj: UP-I-KSI-09-09/25 od 29.10.2025. godine, zaprimljen dana 31.10.2025. godine, A. D., direktor JP „Komunalno Brčko“ d.o.o. Brčko distrikta Bosne i Hercegovine, nosilac javne funkcije Komisiji za odlučivanje o sukobu interesa dostavio je Izjašnjenje dana 04.11.2025. godine u kojem je naveo da su podaci upisani u trenutku dostavljanja Izvještaja o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima obavezu izdržavanja, dana 28.03.2025. godine tačni jer je tada posjedovao prijavljeno vozilo Škoda Octavia. Dana 12.07.2025. godine navedeno vozilo je prodao odnosno zamijenio uz doplatu od 16.000,00 KM za putnički automobil marke Peugeot 3008, godina proizvodnje 2018., koje se u službenim evidencijama od tada vodi u njegovom vlasništvu, a prethodno vozilo se s tim datumom više ne vodi u njegovom vlasništvu, te je svjestan propusta koji je učinio zbog neprijavljivanja promjena u zakonskom roku, ali i da je do neprijavljivanja došlo slučajno i zabunom zbog ogromnih poslovnih i porodičnih obaveza, te je spreman ukoliko je potrebno da za isti snosi odgovornost. Uz dostavljeno Izjašnjenje, nosilac javne funkcije, dostavio je i Aneks II- Obrazac o imovinskom stanju, sa pravnim osnovom (Ugovor o posredništvu u trgovini motornih vozila broj: ██████████) o pokretnoj imovini, koja je bila predmet pokretanja ovog postupka.

Uvidom u dostavljene podatke od strane Vlade Brčko distrikta Bosne i Hercegovine – Odjeljenje za javni registar, broj: ██████████ od 20.10.2025. godine, utvrđeno je da nosilac javne funkcije u svom vlasništvu ima registrovan automobil marke Peugeot 3008, registarskih oznaka ██████████, godina proizvodnje 2018., naravno bez podatka o datumu unosa i pravnom osnovu sticanja predmetnog vozila.

Članom 19. stav (4) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije odgovara za tačnost i potpunost podataka u Izvještaju za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, a stavom (2) istog člana, između ostalog propisano je da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom c) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u Bosni i Hercegovini i inostranstvu, dok je članom 20. stav (3) tačka b) Zakona propisano da Izvještaj sadrži podatke o stečenoj imovini, o pokretnim stvarima veće vrijednosti, te shodno stavu (4) istog člana Zakona, pod pokretnim stvarima veće vrijednosti, između ostalog, smatraju se vozila pojedinačne vrijednosti veće od 5.000,00 KM. Članom 21. stav (1) tačka b) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije vrši dopunu Izvještaja

za svaku promjenu iz člana 19. stava (2) ovog Zakona, kao i u slučaju promjena sadržaja Izvještaja koje se odnose na uvećanje imovine po bilo kojem osnovu u iznosu većem od 10.000,00 KM, u roku od 30 (trideset) dana od dana nastanka promjene. Utvrđeno je da automobil Peugeot 3008 ima vrijednost od 29.000,00 KM i da je nabavljen zamjenom automobila Škoda Octavia i doplatom u iznosu od 16.000,00 KM.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da A. D. nije dopunio Izvještaj o imovinskom stanju te prijavio pokretnu imovinu Peugeot 3008 u roku od 30 dana od dana nastanka promjene te je postupio protivno odredbi člana 21. stav (1) tačka b) Zakona o sprečavanju sukoba interesa u institucijama Brčko distrikta Bosne i Hercegovine, a u vezi sa članom 19. stav (2) Zakona o sprečavanju sukoba interesa u institucijama Brčko distrikta Bosne i Hercegovine.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju, vodeći računa o težini i posljedicama povrede Zakona, te njegovom postupanju i odgovornosti, činjenici da je A. D. u toku postupka, dostavio Komisiji dopunu Izvještaja za neprijavljenu pokretnu imovinu koja je bila predmet pokrenutog postupka, ličnosti nosioca javne funkcije, odnosu imenovanog prema kršenju odredaba Zakona kao i opredijeljenosti imenovanog da postupi u skladu sa Zakonom, te otkloni razloge koji su doveli do kršenja odredaba Zakona kao i prouzrokovanoj posljedici, radi o očito lakšem obliku kršenja odredaba Zakona, koje nisu nanijele štetu integritetu javne funkcije koju A. D. obavlja, Komisija je stava da izrečena opomena u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25., 38. i 43. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl.pravnik

Dostaviti:

- A. D., ul. [REDACTED], Brčko,
- Internet stranica Komisije,
- Evidenciji,
- Arhivi.